

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI KHAMIS, 24 MAC 2016, PUKUL 10.00 PAGI

Bil. 12

PERTANYAAN-PERTANYAAN BAGI JAWAB LISAN

1. PR-1341-L72016
Dato' Sri Haji Abdul Azeez bin Abdul Rahim [Baling] minta **MENTERI PENDIDIKAN** menyatakan apakah tindakan Kementerian dalam menyelesaikan masalah beberapa buah sekolah di Parlimen Baling yang sangat padat dengan kapasiti penduduk di sesetengah kawasan yang ramai sehingga menyebabkan sekolah tidak mampu menampung jumlah pelajar yang berlebihan. Contohnya Sekolah Kebangsaan Baling yang terletak di Pekan Baling.
2. PR-1341-L73093
Tuan Mohamed Hanipa bin Maidin [Sepang] minta **MENTERI SUMBER MANUSIA** menyatakan :-
 - (a) adakah satu kajian terperinci kajian kesan jangka pendek dan jangka panjang apabila Kerajaan akan diwajibkan meminda Akta Pekerjaan 1955 bagi membolehkan pekerja asing menubuhkan Kesatuan Sekerja dan juga memegang jawatan dalam mana-mana Kesatuan Sekerja di negara ini, selepas Kerajaan bersetuju menandatangani TPPA; dan
 - (b) jika ada kajian dibuat , apakah hasil kajian tersebut dan jika tidak ada mengapa tiada kajian dibuat.
3. PR-1341-L73617
Tuan Haji Ahmad Lai bin Bujang [Sibuti] minta **MENTERI DALAM NEGERI** menyatakan berapa jumlah kes kehilangan kanak-kanak di seluruh Malaysia dan negeri manakah mencatatkan kes tertinggi serta nyatakan kes kehilangan kanak-kanak mengikut jantina, umur dan bangsa. Apakah telah dikenalpasti punca utama kes ini berlaku dan langkah-langkah diambil mengesan kanak-kanak hilang.
4. PR-1341-L72103
Tuan Zairil Khir Johari [Bukit Bendera] minta **MENTERI PENDIDIKAN** menyatakan *Highly Immersive Programme* yang diumumkan Perdana Menteri dalam Belanjawan 2016, termasuk kos dan jumlah sekolah yang terlibat.

5. PR-1341-L73632
Datuk Abd Rahim bin Bakri [Kudat] minta **MENTERI LUAR NEGERI** menyatakan apakah peranan yang dimainkan oleh Kerajaan dalam memastikan kestabilan dan keharmonian di kawasan Laut China Selatan susulan ketegangan yang berlaku di kawasan itu ketika ini.
6. PR-1341-L72711
Tuan Teo Kok Seong [Rasah] minta **MENTERI DALAM NEGERI** menyatakan :-
 - (a) bilakah Kerajaan akan meningkatkan kadar saman kesalahan jalan raya; dan
 - (b) jumlah saman kesalahan jalan raya dikeluarkan dan kutipan yang diterima sejak tahun 2014- 2016.
7. PR-1341-L72002
Datuk Joseph Salang anak Gandum [Julau] minta **MENTERI KESIHATAN** menyatakan adakah Kementerian merancang untuk membekalkan klinik-klinik yang berhampiran dengan sungai dan jauh dari jalan raya dengan bot yang diubah suai untuk kegunaan semasa kecemasan.
8. PR-1341-L72570
Tuan V. Sivakumar [Batu Gajah] minta **MENTERI SUMBER MANUSIA** menyatakan jumlah wang yang diperuntukkan kepada MySkill Foundations sejak penubuhannya dan bagaimanakah wang peruntukan itu dibelanjakan oleh pihak berkenaan. Adakah pelajar-pelajar yang menjalani latihan di MySkills Foundation itu juga diberi bantuan Pinjaman Tabung Pembangunan Kemahiran (PTPK).
9. PR-1341-L71658
Dr. Noor Azmi bin Ghazali [Bagan Serai] minta **MENTERI PENDIDIKAN TINGGI** menyatakan apakah Kementerian bersedia untuk mewujudkan Pusat Saintis Muda di Universiti Penyelidikan Negara untuk memenuhi peranan Universiti Awam untuk bersama sekolah-sekolah terpilih harian, SBP, dan MRSM bagi membudayakan penyelidikan di peringkat sekolah lagi sebagai komponen penting menjadi negara maju dan mengadakan program seperti konferen untuk Saintis Muda seperti MyCys (*Malaysian Conference For Young Scientists*) yang pernah dilakukan oleh UPM.
10. PR-1341-L73220
Tuan Ahmad Marzuk bin Shaary [Bachok] minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah ibu tunggal menurut definisi terbaru di Parlimen Bachok. Apakah usaha yang dibuat oleh pihak Kementerian dalam memastikan pendaftaran ibu tunggal ini dapat dibuat dengan cepat dan berkesan.
11. PR-1341-L71773
Datuk Wee Jeck Seng [Tanjong Piai] minta **MENTERI KESIHATAN** menyatakan bilakah Klinik (Kelas 3) Pekan Nanas dapat disiapkan memandangkan *progress* kerja projek berkenaan agak lewat berbanding sasaran sebelumnya.

12. PR-1341-L72492
Dr. Ong Kian Ming [Serdang] minta **MENTERI PENDIDIKAN** menyatakan mengapa projek sekolah kebangsaan di Taman Sutera, Kajang, belum disiapkan dan status terkini projek tersebut.
13. PR-1341-L73207
Datuk Rozman bin Isli [Labuan] minta **MENTERI PENDIDIKAN** menyatakan adakah pihak Kementerian akan meneruskan rancangan kaedah pembelajaran secara maya iaitu pengguna muat turun satu bahan rujukan ke peranti tanpa menggunakan buku teks.
14. PR-1341-L72455
Puan Siti Zailah binti Mohd Yusoff [Rantau Panjang] minta **MENTERI DALAM NEGERI** menyatakan kedudukan anak-anak yang tidak sah taraf yang dilahirkan di negara ini boleh dikeluarkan dokumen pengenalan diri.
15. PR-1341-L71803
Datuk Jumat bin Idris [Sepanggar] minta **MENTERI BELIA DAN SUKAN** menyatakan apakah pelan jangkamasa pendek dan jangkamasa panjang Kementerian dalam menfokuskan sukan-sukan kurang popular seperti ragbi kerana mereka menunjukkan potensi yang tinggi dalam beberapa siri pertandingan sebelum ini.
16. PR-1341-L72659
Dato' Ngeh Koo Ham [Beruas] minta **MENTERI PEMBANGUNAN WANITA, KELUARGA DAN MASYARAKAT** menyatakan sama ada Kerajaan bercadang menaikkan peruntukan kepada Jabatan Kebajikan untuk menolong warga miskin mengatasi masalah kenaikan harga barang dan kos sara hidup yang telah naik mendadak.
17. PR-1341-L72850
Ir. Shaharuddin bin Ismail [Kangar] minta **MENTERI SUMBER MANUSIA** menyatakan apakah langkah yang diambil oleh Kementerian dalam menyediakan peluang pekerjaan supaya dapat mengurangkan kadar pengangguran di kalangan graduan dari dalam mahupun luar negara berikutan keadaan ekonomi global yang tidak menentu.
18. PR-1341-L71699
Dato' Kamarul Baharin bin Abbas [Telok Kemang] minta **MENTERI KESIHATAN** menyatakan :-
 - (a) berapa banyak "*clinical trial*" yang dilaksanakan Kementerian semenjak tahun 2000 bagi menentukan perubatan tradisional dan komplementari melepasi kajian serta penyelidikan secara saintifik dari segi keselamatan dan keberkesanan menangani penyakit-penyakit; dan
 - (b) semenjak Akta Perubatan Tradisional dan Komplementari diluluskan adakah usaha-usaha mempertingkatkan kajian-kajian supaya perubatan alternatif digunakan sebagai kaedah baru menangani penyakit.

19. PR-1341-L72256
Tan Sri Datuk Seri Panglima Annuar bin Musa [Ketereh] minta **MENTERI PENDIDIKAN TINGGI** menyatakan jumlah penempatan penuntut Institusi Pengajian Tinggi Awam (IPTA) yang menjalankan program latihan industri dengan Syarikat Berkaitan Kerajaan (GLC) dan apakah perancangan masa panjang Kementerian bagi meningkatkan jumlah penyertaan sekaligus mengurangkan masalah graduan menganggur masa kini.
20. PR-1341-L72094
Raja Dato' Kamarul Bahrin Shah [Kuala Terengganu] minta **MENTERI PENGANGKUTAN** menyatakan apakah kos baik pulih kawasan 'KLIA 2' terkini dan bilakah masalah pemendapan dijangka boleh diatasi.
21. PR-1341-L72337
Dato' Haji Zainudin bin Ismail [Jelebu] minta **MENTERI PENDIDIKAN** menyatakan berapa ramai guru dalam kategori duka lara yang telah dapat berpindah sekolah tempat mengajar dan apakah jaminan perpindahan demikian tidak menimbulkan masalah "*mismatching*" mata pelajaran dengan guru atau lebih guru bagi mata pelajaran tertentu dalam satu sekolah.
22. PR-1341-L72294
Tuan Jeff Ooi Chuan Aun [Jelutong] minta **MENTERI SUMBER ASLI DAN ALAM SEKITAR** menyatakan tentang kedudukan terkini di bawah Rancangan Malaysia Ke-11 mengenai peruntukan dana bagi Fasa 2 Rancangan Tebatan Banjir Sungai Pinang, Jelutong, yang telah tertunda-tunda sejak RMK-9 (2005-2010).
23. PR-1341-L71675
Tuan Wilson Ugak Kumbong [Hulu Rajang] minta **MENTERI KOMUNIKASI DAN MULTIMEDIA** menyatakan status menara komunikasi di Rh. Laso, Nanga Antawau, Klinik Nanga Melinau, SK Rantau Panjai, Sg. Bena, SK Lepong Kain, Klinik Nanga Merirai, SK Sg. Tunoh, SK Long Urun Belaga, Rumah Belulok di Uma Sambop, SK Long Busang dan Belaga.
24. PR-1341-L71985
Tuan Ng Wei Aik [Tanjong] minta **MENTERI DALAM NEGERI** menyatakan bilakah pindaan ke atas Akta Hasutan 1948 akan diwartakan dan dikuatkuasakan. Apakah halangan yang menyebabkan pindaan-pindaan tersebut tidak dapat dikuatkuasakan sehingga hari ini.
25. PR-1341-L71966
Dr. Mansor bin Abd Rahman [Sik] minta **MENTERI KEWANGAN** menyatakan apakah langkah-langkah Kerajaan dalam menampung pendapatan negara daripada hasil minyak jika harga pasaran minyak dunia terus jatuh dan kekal rendah dalam masa yang lama.

26. PR-1341-L71781
Tuan M. Kulasegaran [Ipoh Barat] minta **MENTERI DALAM NEGERI** menyatakan :-
- (a) apakah manfaat yang akan diperolehi dalam jangka masa yang pendek dan panjang terhadap program menggaji (*Rehiring Programme*) yang melibatkan pekerja asing tanpa izin yang dilaksanakan melalui kaedah online 31 Disember tahun ini; dan
 - (b) bolehkah pelarian (*Refugees*) memohon dalam skim diatas. Jika tidak, mengapa.
27. PR-1341-L71694
Dato' Haji Abdul Rahman bin Haji Mohamad [Lipis] minta **MENTERI SUMBER ASLI DAN ALAM SEKITAR** menyatakan sama ada Kementerian menetapkan syarat sesebuah lesen kejuruteraan sumber mineral untuk melayakkan operasi sesebuah kuari itu dijalankan.
28. PR-1341-L71817
Tuan Fong Kui Lun [Bukit Bintang] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan langkah-langkah yang telah Kerajaan lakukan untuk menyelesaikan masalah kenaikan kos sara hidup yang dihadapi oleh rakyat jelata.
29. PR-1341-L73133
Dato' Abdul Manan bin Ismail [Paya Besar] minta **PERDANA MENTERI** menyatakan dakwaan ejen-ejen perpaduan seperti Jawatankuasa Rukun Tetangga, Kelab Rukun Negara dan Sekretariat Rukun Negara gagal mendampingi dan mendidik soal perpaduan dan keharmonian di kalangan rakyat jelata terutama melihat sebahagian perkembangan tidak sihat dalam media sosial baharu.
30. PR-1341-L72907
Tuan Sim Chee Keong [Bukit Mertajam] minta **MENTERI DALAM NEGERI** menyatakan status daftar penjenayah seksual dan sama ada perkara ini akan dibincangkan dengan kakus wanita serta masyarakat sivil sebelum pelaksanaan.
31. PR-1341-L73056
Dato' Shamsul Anuar bin Haji Nasarah [Lenggong] minta **MENTERI KEWANGAN** menyatakan adakah Kementerian bercadang untuk memperhalusi proses dan prosedur tuntutan KWSP bagi waris mangsa yang seakan sukar untuk membuat tuntutan.
32. PR-1341-L72220
Tuan Wan Hasan bin Mohd Ramli [Dungun] minta **MENTERI KEWANGAN** menyatakan langkah-langkah dan usaha menaikkan nilai ringgit berbanding Riyal Saudi bagi kepentingan rakyat Malaysia yang mengerjakan ibadah umrah dan haji.

33. PR-1341-L72758
Tuan Che Mohamad Zulkifly bin Jusoh [Setiu] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan tindakan pengawalan aktiviti penggunaan tanah yang dijalankan khususnya di lereng-lereng bukit yang berdekatan dengan jalan-jalan utama ataupun lebuhraya bagi menjaga keselamatan pengguna jalanraya di negara ini.
34. PR-1341-L73041
Tuan Loke Siew Fook [Seremban] minta **MENTERI KEWANGAN** menyatakan apakah tujuan pemberian RM2,374,296,200 kepada KL International Airport Berhad di bawah Butiran 021800 Perkhidmatan Am Perbendaharaan dan sehingga bilakah pemberian ini perlu ditanggung oleh Kerajaan.
35. PR-1341-L72994
Puan Rubiah binti Haji Wang [Kota Samarahan] minta **MENTERI PERTANIAN DAN INDUSTRI ASAS TANI** menyatakan pencapaian terkini berkaitan program Agropreneur Muda yang telah dijalankan oleh pihak Kementerian dalam memimpin dan mendidik anak muda berkaitan perniagaan berasaskan hasil pertanian.
36. PR-1341-L72522
Tuan Ramkarpal Singh a/l Karpal Singh [Bukit Gelugor] minta **PERDANA MENTERI** menyatakan apakah pendirian Kerajaan berkenaan cadangan Peguam Negara untuk meminda Akta Rahsia Rasmi (OSA) untuk mengenakan hukuman yang lebih berat untuk kesalahan-kesalahan di bawah akta tersebut dan mengapa hukuman-hukuman yang sedia ada tidak memadai.
37. PR-1341-L73480
Datuk William @ Nyallau anak Badak [Lubok Antu] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan adakah Kementerian bercadang untuk menambah jumlah perumahan mampu milik di Sarawak.
38. PR-1341-L72950
Tuan Ignatius Dorell Leiking [Penampang] minta **MENTERI DALAM NEGERI** menyatakan jika Kerajaan telah meminta pihak Filipina untuk menangkap warga Filipina yang terlibat dalam pencerobohan Tanduo Sabah termasuk seorang yang bernama "Jacel Kiram" dan serahkan mereka kepada Kerajaan Persekutuan Malaysia untuk menghadapi tuduhan di Mahkamah Persekutuan Malaysia atas kesalahan melancarkan perang ke atas Sabah dan kes pencerobohan Tanduo.
39. PR-1341-L72172
Dato' Ahmad Fauzi bin Zahari [Setiawangsa] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan langkah-langkah komprehensif yang telah dilaksanakan dan yang sedang dirancang secara khusus oleh Kerajaan bagi menangani tekanan kos sara hidup yang kian meningkat akibat kenaikan harga barangan dan perkhidmatan.

40. PR-1341-L72031
Puan Hajah Fuziah binti Salleh [Kuantan] minta **PERDANA MENTERI** menyatakan apakah tindakan pihak Kementerian dan FELDA berkenaan nasib peneroka FELDA Bukit Goh yang telah tertipu oleh pelombong-pelombong bauksit yang mana tanah ladang mereka kini sudah pun tidak boleh digunakan untuk menanam sawit dan bertukar menjadi padang jarak padang tekukur.
41. PR-1341-L71605
Datuk Sapawi bin Ahmad Wasali [Sipitang] minta **PERDANA MENTERI** menyatakan jumlah ajaran sesat yang dikenal pasti bergerak aktif di negara ini dan apakah langkah-langkah pencegahan yang diambil oleh Kerajaan.
42. PR-1341-L73157
Tuan Ahmad Baihaki bin Atiqullah [Kubang Kerian] minta **PERDANA MENTERI** menyatakan apakah perkembangan Jawatankuasa Teknikal Pelaksanaan Undang-undang Jenayah Syariah Kerajaan Persekutuan yang ditubuhkan pada tahun 2014.
43. PR-1341-L73293
Dato' Hasan bin Arifin [Rompin] minta **MENTERI PERTANIAN DAN INDUSTRI ASAS TANI** menyatakan berapa banyak metrik tan negara mengimport pelbagai jenis beras pada tahun 2013, 2014 dan 2015.
44. PR-1341-L73424
Datuk Wira Haji Ahmad bin Hamzah [Jasin] minta **MENTERI KEWANGAN** menyatakan langkah preamtif untuk menangani kes mufliis yang meningkat ketara antara tahun 2007 sehingga 2013 dan jumlah ini berkemungkinan terus meningkat ekoran ketidaktentuan ekonomi global dan *trend* pemberhentian kerja dan pengangguran yang bertambah.
45. PR-1341-L71854
Dato' Johari bin Abdul [Sungai Petani] minta **PERDANA MENTERI** menyatakan :-
- (a) berapakah jumlah wang yang dibelanjakan oleh Yayasan Pembangunan Ekonomi Islam (YAPEIM) untuk menganjurkan Kursus Perkahwinan di luar negara; dan
 - (b) sejauh mana ianya berjaya menghapuskan atau mengurangkan budaya lesbian, gay, bisektual dan transgender (LGBT) di negara ini.
46. PR-1341-L73130
Datuk Liang Teck Meng [Simpang Renggam] minta **MENTERI PENGANGKUTAN** menyatakan :-
- (a) apakah status terkini pencarian MH370 yang sudah hampir 2 tahun hilang dan tidak dikenaplasti kedudukannya sehingga hari ini dan berapakah jumlah yang telah Kerajaan belanjakan dalam misi pencarian ini; dan

- (b) apakah telah ada sebarang petanda siapakah dalang yang menembak jatuh MH17 dan apakah usaha terkini pihak Kerajaan dalam mengambil tindakan terhadap dalang tersebut.
47. PR-1341-L73282
Tuan Gooi Hsiao-Leung [Alor Setar] minta **PERDANA MENTERI** menyatakan kelambatan kenapa tiada tindakan diambil oleh pejabat Ketua Peguam Negara untuk mendakwa Mashitah Ibrahim atas ucapan beliau dalam November 2014, yang menuduh “orang Cina di Kedah membakar kitab”.
48. PR-1341-L72134
Tuan Su Keong Siong [Ipoh Timor] minta **PERDANA MENTERI** menyatakan jumlah projek perumahan Skim Perumahan Rakyat 1Malaysia (PRIMA) yang sedang dibina sejak ia di lancarkan di dalam negeri Perak. Nyatakan jumlah pecahan mengikut daerah-daerah masing-masing.
49. PR-1341-L72819
Datuk Raime bin Unggi [Tenom] minta **MENTERI SUMBER ASLI DAN ALAM SEKITAR** menyatakan projek tebatan banjir di seluruh negeri Sabah, terutama di Parlimen Tenom dan apakah perancangan masa depan bagi projek tebatan banjir ini.
50. PR-1341-L71931
Dato' Mansor bin Othman [Nibong Tebal] minta **MENTERI PERTANIAN DAN INDUSTRI ASAS TANI** menyatakan jumlah bilangan peserta dan jumlah pembiayaan pinjaman yang disalurkan oleh TEKUN Nasional sehingga kini di negeri Selangor mengikut kategori perniagaan dan kawasan Parlimen.
51. PR-1341-L72748
Dr. Ismail bin Daut [Merbok] minta **MENTERI KESIHATAN** menyatakan perkembangan terkini wabak denggi di seluruh negara mengikut negeri dan nyatakan sejauh manakah keberkesanan program pencegahan yang telah dijalankan oleh pihak Kementerian.
52. PR-1341-L73205
Tuan Wong Tien Fatt @ Wong Nyuk Foh [Sandakan] minta **MENTERI SUMBER MANUSIA** menyatakan sama ada Kerajaan boleh mempertimbangkan untuk menggantikan perancangan Kerajaan memasukkan 1.5 juta orang pekerja asing dari Bangladesh dengan menggunakan lebih 1 juta orang PATI yang sudah ada di negeri Sabah. Jika tidak, kenapa.
53. PR-1341-L73303
Dato' Dr. Tan Kee Kwong [Wangsa Maju] minta **MENTERI DALAM NEGERI** menyatakan adakah wujud sebarang tindakan terhadap pemilik premis perjudian mesin di Kuala Lumpur yang semakin banyak terutama di sekitar Wangsa Maju.

54. PR-1341-L73436
Dato' Haji Mahfuz bin Omar [Pokok Sena] minta **PERDANA MENTERI** menyatakan bilakah pindaan Akta Mahkamah Syariah (Bidang kuasa Jenayah) 1965 Akta 355 untuk meningkatkan kadar hukuman kepada sebahagian kesalahan jenayah syariah bagi membolehkan perlaksanaan sebahagian dari Kanun Jenayah Syariah 11 (Hudud) Kelantan dilaksanakan.
55. PR-1341-L72511
Datuk Haji Shabudin bin Yahaya [Tasek Gelugor] minta **MENTERI PERTANIAN DAN INDUSTRI ASAS TANI** menyatakan adakah Kementerian bercadang untuk menggunakan khidmat koperasi-koperasi komuniti seperti Koperasi Kariah Masjid dan Koperasi Bela Rakyat (Kobera) untuk kerja-kerja pengagihan beras di bawah Program MyBeras.
56. PR-1341-L73452
Tuan Wong Ling Bui [Sarikei] minta **PERDANA MENTERI** menyatakan adakah Kerajaan Pusat mempunyai proses mengembalikan hak-hak autonomi bagi negeri Sarawak bersedia melantik seorang Timbalan Perdana Menteri dan seorang Timbalan Menteri Kewangan yang berasal dari Sarawak.
57. PR-1341-L72966
Tuan Nga Kor Ming [Taiping] minta **MENTERI DALAM NEGERI** menyatakan secara terperinci berapakah jumlah bilangan lesen senjata api yang pernah diluluskan oleh pihak Kerajaan mengikut kategori dan apakah langkah-langkah yang dilakukan untuk mencegah penyeludupan masuk senjata api dari luar negara.
58. PR-1341-L72894
Datuk Hajah Norah binti Abd Rahman [Tanjong Manis] minta **MENTERI LUAR NEGERI** menyatakan pendekatan dan penyelesaian yang akan diambil oleh Kerajaan berkenaan pencerobohan kapal perang dari Negara China di kawasan perairan sekitar Beting Patinggi Ali, kira-kira 84 batu nautika dari pantai Miri, Sarawak iaitu kawasan Zon Ekonomi Eksklusif (EEZ) negara yang telah dikesan berlaku sejak tahun lepas.
59. PR-1341-L72452
Ust. Datuk Dr. Mohd. Khairuddin bin Aman Razali [Kuala Nerus] minta **MENTERI PENGANGKUTAN** menyatakan senarai projek dan anggaran perbelanjaan setiap projek yang akan dibangunkan menerusi program pembangunan infrastruktur dengan jumlah peruntukan sebanyak RM6.8 bilion serta langkah-langkah penjimatan yang akan dibuat.
60. PR-1341-L72196
Puan Hajah Zuraida binti Kamaruddin [Ampang] minta **MENTERI DALAM NEGERI** menyatakan adakah media atas talian seperti Malaysiakini, dan The Malaysian Insider dilarang untuk membuat liputan di Kementerian Dalam Negeri walaupun mereka mempunyai permit yang sah.
61. PR-1341-L72226
Tuan Haji Nasrudin bin Hassan [Temerloh] minta **MENTERI DALAM NEGERI** menyatakan unjuran jumlah warga asing di Malaysia selepas pelaksanaan Program Penggajian dan Penempatan Semula PATI.

62. PR-1341-L71626
Dato' Haji Mohd Zaim bin Abu Hasan [Parit] minta **MENTERI PERTANIAN DAN INDUSTRI ASAS TANI** menyatakan sejauh mana langkah tindakan Kementerian bagi mengekang pengaruh orang tengah dalam industri pertanian berhasil untuk menurunkan harga barang terutama yang dijual di pasar tani.
63. PR-1341-L73105
Tuan William Leong Jee Keen [Selayang] minta **MENTERI LUAR NEGERI** menyatakan langkah-langkah yang diambil untuk mengurangkan ketegangan pada tuntutan Wilayah China ke atas pulau-pulau di Laut China Selatan dengan negara-negara jiran termasuk Malaysia.
64. PR-1341-L72162
Tuan Idris bin Haji Ahmad [Bukit Gantang] minta **MENTERI KEWANGAN** menyatakan berapakah jumlah nilai rampasan barang seludup oleh pihak Kastam DiRaja Malaysia sejak 2010 hingga 2015.
65. PR-1341-L72679
Tuan Shamsul Iskandar bin Mohd Akin [Bukit Katil] minta **MENTERI SUMBER MANUSIA** menyatakan secara terperinci bentuk bantuan dan program latihan industri yang dijalankan pihak Kementerian berserta peruntukan yang disalurkan Kerajaan bagi membantu pekerja industri seperti sektor perkilangan, pembuatan dan perkhidmatan yang diberhentikan kerja akibat kelembapan ekonomi.
66. PR-1341-L73604
Dato' Sri Hasan bin Malek [Kuala Pilah] minta **MENTERI KEMAJUAN LUAR BANDAR DAN WILAYAH** menyatakan agar pihak MARA mengekalkan pinjaman sara hidup dan yuran pengajian kepada pelajar-pelajar berkeelayakan yang menuntut di IPTS di bawah kelolaan MARA. Ini secara tidak langsung dapat membantu penjaga serta pelajar yang kurang berkemampuan untuk meneruskan pelajaran di peringkat yang lebih tinggi.
67. PR-1341-L71729
Laksamana Pertama Mohamad Imran bin Abd Hamid (B) [Lumut] minta **MENTERI KEWANGAN** menyatakan status dan tindakan ke atas Laporan Jawatan Kuasa Kira-Kira Wang Negara (PAC) mengenai :-
- (a) Pengurusan Pelaburan Hartanah Luar Negara (DR 7 Tahun 2014); dan
 - (b) Pengurusan Mesin Pengimbas Kargo (DR 4 Tahun 2015)

ATURAN URUSAN MESYUARAT DAN USUL-USUL

1. **Usul dibuat oleh Yang Berhormat Tuan Haji Ahmad Lai bin Bujang [Sibuti] dan masalah dicadangkan :-**

“ Bahawa suatu ucapan yang tidak sepertinya dipersembahkan kepada Seri Paduka Baginda Yang di-Pertuan Agong, demikian bunyinya:-

“ Ampun Tuanku,

Patik, Yang di-Pertua dan Ahli-ahli Dewan Rakyat Malaysia di dalam Persidangan Parlimen, memohon ampun mempersembahkan suatu ucapan yang ikhlas daripada Majlis Dewan Rakyat mengucapkan berbilang-bilang syukur dan menjunjung kasih kerana Titah Ucapan Seri Paduka Baginda semasa membuka Penggal Keempat, Parlimen Yang Ketiga Belas.”

Menyambung semula Perbahasan atas masalah (23 Mac, 2016)

- | | | | |
|----|---------------|--|-------------------------------|
| 2. | (D.R. 2/2016) | Rang Undang-undang Perbekalan Tambahan (2015) 2016 | Bacaan Kali Yang Kedua |
|----|---------------|--|-------------------------------|

DAN

Menteri Kewangan akan mencadangkan :-

"Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan bahawa jumlah wang tambahan sebanyak tiga ratus sembilan puluh satu juta empat ratus enam puluh ringgit (RM391,000,460) diperuntukkan daripada Kumpulan Wang Pembangunan bagi tahun kewangan 2015 bagi Maksud dan Butiran (Projek) seperti yang dinyatakan dalam ruang pertama dan kedua penyata Anggaran Perbelanjaan Pembangunan Tambahan Pertama 2015 yang dibentangkan sebagai Kertas Perintah 3 Tahun 2016 dan yang disenaraikan di sebelah Maksud dan Butiran (Projek) dalam ruang sembilan dan sepuluh penyata tersebut."

- | | | | |
|----|----------------|--|-------------------------------|
| 3. | (D.R. 36/2015) | Rang Undang-undang Keselamatan Sosial Pekerja (Pindaan) 2015 | Bacaan Kali Yang Kedua |
|----|----------------|--|-------------------------------|

[Menteri Sumber Manusia]

- | | | | |
|----|----------------|--|---|
| 4. | (D.R. 30/2015) | Rang Undang-undang Syarikat 2015 | “ |
| | | [Menteri Perdagangan Dalam Negeri, Koperasi dan Kepenggunaan] | |

5. (D.R. 29/2015) Rang Undang-undang Skim Kepentingan 2015. “

[Menteri Perdagangan Dalam Negeri, Koperasi dan Kepenggunaan]
6. (D.R. 34/2015) Rang Undang-undang Dadah Berbahaya (Langkah-Langkah Pencegahan Khas) (Pindaan) 2015. “

[Menteri Dalam Negeri]
7. (D.R. 37/2015) Rang Undang-undang Profesion Undang-undang (Pindaan) 2015 “

[Menteri di Jabatan Perdana Menteri]
8. (D.R. 39/2015) Rang Undang-undang Kanak-Kanak (Pindaan) 2015 “

[Menteri Pembangunan Wanita, Keluarga dan Masyarakat]
9. (D.R.9/2015) Rang Undang-undang Kanun Tatacara Jenayah (Pindaan) 2015 “

[Menteri di Jabatan Perdana Menteri]
10. (D.R.12/2015) Rang Undang-undang Keterangan (Pindaan) 2015 “

[Menteri di Jabatan Perdana Menteri]
11. (D.R.1/2016) Rang Undang-Undang Bekalan Gas (Pindaan) 2016 “

[Menteri di Jabatan Perdana Menteri]
12. (D.R.35/2015) Rang Undang-undang Persaingan (Pindaan) 2015 “

[Menteri Perdagangan Dalam Negeri, Koperasi dan Kepenggunaan]

13. PR-1341-U72985
Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa pembangunan infrastruktur di negeri Sabah masih jauh ketinggalan berbanding dengan negeri-negeri lain di Malaysia. Dan mengambil maklum juga bahawa negeri Sabah memerlukan lebih banyak dana demi untuk membangunkan kemudahan infrastruktur

sekali di kawasan luar bandar serta keperluan-keperluan lain seperti masalah tebatan banjir, projek perumahan rakyat termiskin dan lain-lain. Dan mengambil maklum juga bahawa rakyat negeri Sabah juga beraspirasi seperti rakyat negeri Sarawak, sepertimana yang dinyatakan oleh YAB Tan Sri Adenan Satem (Ketua Menteri Sarawak) ingin memohon agar royalti minyak dapat dinaikkan kepada kadar 20%. Dan mengambil maklum juga, sekiranya royalti minyak dinaikkan pada kadar 20%, maka dengan lebih dana tersebut, kerajaan negeri Sabah akan dapat melaksanakan keperluan-keperluan di atas dengan lebih baik dan cepat lagi. Maka, bagi meredakan rungutan dan tuntutan rakyat negeri Sabah, maka Dewan yang mulia ini hendaklah mengambil ketetapan bahawa Kerajaan Malaysia menaikkan kadar royalti minyak bagi negeri Sabah kepada kadar 20% dan sekaligus membolehkan negeri Sabah membangun dengan lebih pesat lagi."

[Perdana Menteri]

14. PR-1341-U73002

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa kesesakan Jalan Putatan merupakan rungutan hampir setiap pengguna jalan tersebut. Dan mengambil maklum juga bahawa Jalan Putatan merupakan sebahagian daripada rangkaian Jalan Pan Borneo Highway yang mana sepatutnya mendapat perhatian utama dan bebas kesesakan. Dan mengambil maklum juga, bahawa kesesakan Jalan Putatan juga disebabkan rekabentuk yang kurang baik di mana terdapat terlalu banyak U-Turn dan simpang, yang menjadi penyebab utama kelancaran aliran trafik selain menjadi punca kemalangan. Dan mengambil maklum juga, bahawa kesesakan Jalan Putatan dapat diatasi dengan membina sebatang Jalan Pantai (Coastal Highway) alternatif yang menghubungkan pekan Tanjung Aru dengan Pekan Kinarut. Dan mengambil maklum juga bahawa, sekiranya jalan pantai alternatif yang dimaksudkan dibina, ianya juga boleh membantu untuk mengelakkan hakisan pantai di sepanjang laluan tersebut. Dan mengambil maklum juga bahawa, untuk membina jalan baru sebagai laluan alternatif bagi Jalan Putatan akan menelan belanja yang besar terutama sekali bagi tujuan pampasan tanah yang dilalui. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah membina jalan pantai alternatif bagi Jalan Putatan demi untuk kesejahteraan rakyat yang menggunakan laluan tersebut."

[Menteri Kerja Raya]

15. PR-1341-U73023

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa keengganan Kerajaan Persekutuan untuk mengiktiraf keputusan Peperiksaan Unified Examination Certificate (UEC) telah menimbulkan banyak kontroversi dan masalah terutama sekali kepada pelajar dan ibu/bapa pelajar yang terlibat. Dan mengambil maklum juga bahawa Negeri Sarawak merupakan negeri pertama

di negara ini yang mengiktiraf keputusan peperiksaan UEC sepertimana yang diumumkan oleh YAB Tan Sri Adenan Satem dan sekali gus membolehkan pelajar terlibat meneruskan pengajian mereka dengan tanpa halangan di negeri Sarawak, misalnya di Universiti Malaysia Sarawak. Dan mengambil maklum juga bahawa dengan keengganan Kerajaan Malaysia untuk mengiktiraf keputusan peperiksaan UEC, pelajar yang terlibat terpaksa meneruskan pendidikan mereka di luar negara dan seterusnya bekerja serta menetap di luar negara adalah merupakan kerugian besar negara sebagaimana yang ditekankan oleh YAB Ketua Menteri Sarawak. Dan mengambil maklum juga, bahawa ramai pelajar dan ibu/bapa menganggap bahawa polisi untuk tidak mengiktiraf keputusan peperiksaan UEC ini bersifat diskriminasi di mana pelajar tersebut tidak berpeluang untuk berkhidmat dengan sektor awam di Malaysia.

Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah mengiktiraf keputusan peperiksaan Unified Examination Certificate bagi membolehkan pelajar yang terlibat meneruskan pendidikan mereka di negara ini serta berkhidmat di sektor awam di negara ini."

[Menteri Pendidikan]

16. PR-1341-U73036

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa kualiti air Sungai Sembulan adalah amat tercemar dan tidak sihat sama ada bagi hidupan marin mahupun bagi ekosistem marin negara ini. Dan mengambil maklum juga bahawa Sungai Sembulan merupakan rangkaian akhir aliran air dari beberapa siri saliran dan parit daripada beberapa taman perumahan yang berpenduduk padat, sebelum aliran air dilepaskan ke laut. Dan mengambil maklum juga bahawa kebanyakan sistem merawat air kumbahan yang ada di kawasan perumahan yang terlibat tidak lagi efisien untuk merawat air kumbahan tersebut sebelum dilepaskan ke saliran-saliran atau parit-parit yang akhirnya mengalir ke Sungai Sembulan sebelum berakhir ke laut. Dan mengambil maklum juga bahawa sebahagian besar terumbu karang di sekitar perairan negeri Sabah telah musnah disebabkan oleh aktiviti manusia seperti pelepasan air kumbahan yang tidak terawat ke laut. Diketahui bahawa kemusnahan terumbu karang (Coral Bleaching) merupakan satu daripada penyebab utama pemanasan global. Dan mengambil maklum juga bahawa negara Malaysia adalah merupakan salah sebuah negara penyokong dan pendokong gerakan United Nation Environment Programme (UNEP) sesuai dengan deklarasi Global Climate Change Conference, Copenhagen 2009. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah menyediakan satu dana khas bagi tujuan pembinaan loji rawatan air kumbahan di sekitar Sungai Sembulan sebelum air sungai tersebut dilepaskan ke laut bagi menyelamatkan ekosistem laut negara ini."

[Menteri Sumber Asli dan Alam Sekitar]

17. PR-1341-U71877

Tuan M. Kulasegaran [Ipoh Barat] akan mencadangkan:-

"Bahawa Dewan ini hendaklah mengambil maklum bahawa rang undang-undang harus digubal untuk mengelakkan kes penukaran agama kanak-kanak di bawah umur secara unilateral dengan adanya penguatkuasaan undang-undang yang sewajarnya serta berpadanan dengan nasihat Kabinet pada 2009 iaitu kanak-kanak dikekalkan agama asal mereka sebelum penukaran agama itu berlaku."

[Perdana Menteri]

18. PR-1341-U73419

Dr. Tan Seng Giaw [Kepong] akan mencadangkan:-

"Bahawa Dewan akan membincangkan keberkesanan Malaysia mencegah serangan ganas."

[Menteri Dalam Negeri]

19. PR-1341-U71858

Tuan Fong Kui Lun [Bukit Bintang] akan mencadangkan:-

"Bahawa Kerajaan mempergiatkan usaha untuk menyatupadukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 58 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Malaysia."

[Perdana Menteri]

20. PR-1341-U71862

Tuan Fong Kui Lun [Bukit Bintang] akan mencadangkan:-

"Bahawa Kerajaan memulihkan pilihan raya kerajaan tempatan seluruh negara supaya urus tadbir Kerajaan menjadi lebih cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat."

[Menteri Kesejahteraan Bandar, Perumahan dan Kerajaan Tempatan]

21. PR-1341-U71883

Dato' Johari bin Abdul [Sungai Petani] akan mencadangkan:-

"Bahawa Dewan ini mengambil maklum serta menyedari bahawa Lembaga Tabung Haji adalah sebuah institusi kewangan yang penuh dengan kejayaan dan amat membanggakan rakyat Malaysia khususnya umat Islam. Institusi ini juga menjadi contoh untuk negara Islam yang lain ikuti. Maka ianya mesti dijaga dengan penuh ketelusan dan amanah. Sebarang penyelewangan wajib diambil tindakan pantas dan menyeluruh dan jika ianya runtuh maka orang yang mesti dipersalahkan ialah Perdana Menteri."

[Perdana Menteri]

22. PR-1341-U71884

Dato' Johari bin Abdul [Sungai Petani] akan mencadangkan:-

"Bahawa Dewan ini mengambil maklum bahawa Yayasan Pembangunan Ekonomi Islam Malaysia (YaPEIM) sebuah pertubuhan yang mendapat sokongan umat Islam di Malaysia.

Yayasan ini tertegak dengan niat yang penuh suci bagi membangunkan ekonomi umat Islam di samping menolong mereka yang tidak bernasib baik. Oleh sebab itu sokongan berterusan dari individu dan institusi kepada Yayasan ini membuktikan umat Islam negara ini amat prihatin dengan apa yang terjadi dalam masyarakat Islam. Tetapi membiarkan segelintir individu mengambil kesempatan dari kejayaan Yayasan ini hendaklah dikutuk sekeras-kerasnya. Tindakan lembab oleh Menteri dan Kerajaan dalam memantau perjalanan kewangan Yayasan ini juga harus menerima celaan. Sepatutnya semua pihak yang membelanjakan wang YaPEIM bukan pada tempatnya walaupun 'legally right' tetapi tetap 'morally wrong', mesti bertanggung jawab dan meletakkan jawatan atas kadar segera."

[Perdana Menteri]

23. PR-1341-U71886

Dato' Johari bin Abdul [Sungai Petani] akan mencadangkan:-

"Bahawa Dewan ini mengambil maklum kehidupan rakyat makin dihipit dengan harga barangan yang makin naik dan tidak terkawal akibat pengenalan cukai GST dan pengecilan nilai Ringgit. Semua rakyat di setiap lapisan masyarakat amat merasai keadaan ini. Kerajaan harus bertindak berani seperti yang pernah dilakukan oleh Mantan Perdana Menteri Tun Dr Mahathir Mohamad bila negara menghadapi masalah ekonomi yang mencemaskan pada penghujung tahun 90an. Tindakan utama yang mesti diambil sekarang ialah dengan mengurangkan perbelanjaan di Jabatan Perdana Menteri dan Kerajaan mesti mengamalkan sikap berjimat cermat di semua peringkat pentadbiran negara."

[Menteri Kewangan]

24. PR-1341-U71888

Dato' Johari bin Abdul [Sungai Petani] akan mencadangkan:-

"Bahawa Dewan ini menggesa Kementerian Pendidikan mengambil langkah-langkah segera supaya pelajar-pelajar kita mempunyai pengetahuan dan kebolehan bertutur dalam banyak bahasa terutamanya Bahasa Inggeris, Arab dan Mandarin akan membantu pelajar-pelajar kita bila meninggalkan alam persekolahan dan universiti nanti. Bahasa ini amat luas digunakan dalam kegiatan harian dan perniagaan dalam negeri dan luar negara. Majikan pasti akan mengambil pekerja yang berkebolehan lebih dari satu bahasa, kerana ianya akan menguntungkan majikan dalam banyak aspek. Ketiga-tiga bahasa ini bukanlah sesuatu yang asing bagi kita. Kerajaan harus melihat bagaimana mengintegrasikan pengajaran bahasa-bahasa ini ke dalam sistem pendidikan yang sedia ada. Bayangkan seorang anak Malaysia fasih berbahasa Inggeris, Arab, Mandarin dan dapat mengungkapkan Bahasa Malaysia yang teratur. Sayang sekali apa yang kita sedia ada tidak dimanfaatkan untuk generasi akan datang."

[Menteri Pendidikan]

25. PR-1341-U71890

Dato' Johari bin Abdul [Sungai Petani] akan mencadangkan:-

"Bahawa Dewan ini mengambil maklum data jumlah pendatang asing yang berdokumen dan tidak berdokumen akan berbeza dari satu agensi kerajaan dengan agensi yang lain. Malah Menteri sendiri menjawab dalam Dewan Parlimen dengan menggunakan perkataan "ini anggaran". Ini bermaksud tiada siapa yang mempunyai data sebenar tentang berapa jumlah Bukan Rakyat Malaysia yang berada di sini. Ini amat membahayakan negara. Kerajaan mesti mengambil tindakan yang berterusan bagi mendaftar mereka yang tidak berdokumen. Tindakan mendaftar dengan mengambil tindakan undang-undang terhadap mereka adalah dua perkara yang berbeza. Yang penting adalah setiap manusia yang berada di negara ini mesti mempunyai dokumen. Tindakan segera mesti diambil dan mestilah berterusan."

[Menteri Dalam Negeri]

26. PR-1341-U72582

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gejala pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu diketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat

Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama."

[Menteri Kesejahteraan Bandar, Perumahan dan Kerajaan Tempatan]

27. PR-1341-U72584

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan."

[Menteri Dalam Negeri]

28. PR-1341-U72589

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia."

[Menteri Pendidikan]

29. PR-1341-U72617

Tuan Chua Tian Chang @ Tian Chua [Batu] akan mencadangkan:-

"Bahawa Dewan ini akan menggesa Kerajaan untuk menegakkan prinsip berkecuali sebagaimana yang ditetapkan dalam Non-Alliance Movement (NAM) dan menegaskan bahawa Malaysia tidak akan mengambil bahagian atau menghantar askar untuk menyertai gabungan tentera yang dipimpin Arab Saudi dalam serangan terhadap Yemen, Syria atau mana-mana negara di Timur Tengah."

[Menteri Luar Negeri]

30. PR-1341-U72624

Tuan Chua Tian Chang @ Tian Chua [Batu] akan mencadangkan:-

"Bahawa Dewan ini menggesa Kerajaan untuk membantu penganggur dengan menyediakan bantuan kewangan secara tunai sebanyak RM1200 sebulan untuk tempoh 3 bulan selepas diberhentikan. Skim ini membolehkan pekerja-pekerja yang menganggur menjamin sara hidup mereka sewaktu mencari pekerjaan baru."

[Menteri Sumber Manusia]